

თხრობითი ტექსტის გაგება-გააზრება

დაკვირვებით წაიკითხე ტექსტი და უპასუხე შეკითხვებს.

წელიწადის დროები

გაზაფხულია. გარეთ კარგი ამინდია. მზე ანათებს და თბილა. რეზი და დედა საუბრობენ.

- გაზაფხული გიყვარს? - ეკითხება დედა რეზის.
- მე გაზაფხული მიყვარს. ამ დროს ბევრი ყვავილია. კარგი ამინდებია. ბალახი მწვანეა. ბევრი მარწყვია, - ამბობს რეზი.
- ზაფხული გიყვარს?
- ზაფხული ძალიან მიყვარს. სულ მზეა. სკოლა არ არის და ბევრს ვთამაშობ. მეგობრებთან ვერთობი. მდინარეში ვბანაობ.
- შემოდგომაზე რას იტყვი?
- მიყვარს შემოდგომა. ამ დროს ბევრი ხილია. ძალიან ბევრი ყურძენია. ახალი სასწავლო წელი იწყება.
- ზამთარი?
- ზამთარიც მიყვარს. ზამთარში თოვლი მოდის. ციგით ვსრიალებ. ახალი წელიც ძალიან მიყვარს. თოვლის პაპაც მოდის. მოკლედ, წელიწადის ყველა დრო მიყვარს.

წაიკითხე შეკითხვები. შეარჩიე სწორი პასუხი და შემოხაზე შესაბამისი ასო (ა, ბ ან გ).

1. რას ვიგებთ პირველი წინადადებიდან?

- ა) რატომ საუბრობენ რეზი და დედა.
- ბ) რატომ უყვარს რეზის გაზაფხული.
- გ) წელიწადის რომელი დროა.

2. რატომ უყვარს რეზის გაზაფხული?

- ა) იმიტომ, რომ ბალახი მწვანეა და ბევრი მარწყვია.
- ბ) იმიტომ, რომ ბევრი ხილია და სწავლა იწყება.
- გ) იმიტომ, რომ მეგობრებთან ერთად ერთობა.

3. რეზის ზაფხული ძალიან უყვარს, რადგან:

- ა) კარგი ამინდებია და ბალახი მწვანეა.
- ბ) სკოლა არ არის და ბავშვები ერთობიან.
- გ) ძალიან ბევრი ხილი და ყურძენია.

4. სწავლა იწყება:

- ა) გაზაფხულზე. ბ) ზაფხულში. გ) შემოდგომაზე.

5. რას აკეთებს რეზი ზამთარში?

- ა) მარწყვს კრეფს. ბ) მდინარეში ბანაობს. გ) ციგით სრიალებს.

6. რა ხდება ზამთარში მნიშვნელოვანი?

- ა) ახალი სასწავლო წელი იწყება.
- ბ) ახალი წელი დგება.
- გ) ბავშვები ბევრს თამაშობენ.

7. ტექსტის ბოლოს რეზი ამბობს, რომ:

- ა) ზამთარი თოვლის პაპის გამო უყვარს.
- ბ) ზაფხულში ყველაზე კარგად ერთობა.
- გ) ყველა დრო ძალიან უყვარს.

8. ეს ტექსტი არის:

- ა) დიალოგი. ბ) ლექსი. გ) წერილი.